

Up´n Scheolhoff

Liselotte Greife, Lippsk Platt van Werner Zahn

De Scheole es iut. De Kinner dränge sick iut de Dür. Eun Deil störtet no´n Scheolbus, de annern maket sick up´n Wäg no Hiuse. Seu kürt mienanner, seu jolet sich wat teo, seu strüiet sick. Olls dürnanner. De Scheolhoff es vull Lieben.

Stefan hault sick seon bettken affsüits. Heu will schwanke no Hius. Dat hät wier nich seo geot klappet met dat Lesen. För süin Stöttern kann heu nicks för. In´n Hiuse goht dat öbber jümmer bätter. Heu uibet dat jo auk, hät auk Sprokenunnerricht. Blauß in de Scheolen, vör ol de anneren Kinner, do will dat nich seo. Do wärt heu bange, un dänne geoht dat nich seo, os heu dat will. Heu es auk bange, dat euner äne anspreket. Man schwanke wäg, man schwanke no Hius!

Öbber do kümmt Thorsten an äne ran: „Diu häst jo wedder hadder stöttert“, sächt heu. „Wat es dat jümmer teo´n Janen, düi teoteohorn! Diu bäst teo doof teo´n Lesen“. Stefan will gohn. „Lot müi blaus teofrie!“, anfert heu. „Doof, doof!“, reopet Thorsten. Do blifft Stefan stohn. „Öbber nich seo eun Prohlhans os diu euner bäst“, anfert heu. „Säch dat nich nau mol!“, bölket Thorsten. Un Stafan merket niu, womie heu Thorsten ärgern kann. „Prohlhans, Prohlhans!“, schrüiet heu naumol. Un dänne gohn de beuden upeunanner laus. Seu schubset sick un schloon sick. Annere Jungen kommet doteo. Seu küiket, schrüiet un maket de beuden jümmer duller. Dänn – dänn stölkert Thorsten öbber süine Scheoltasken, fallet met de Kopp up de Steune un licht do os daut.



Niu es butz olles vergätten. Stefan bückt sick dal, ticket Thosten an, kürt teo äne. Öbber Thorster anfert nich. Teon Glücke kümmt de Scheolmester un weut, wat teo deon es. Heu lächt Thorsten up de Süiten, hault eune Deken iut süinen Auto un decket äne teo. Stefan mot no´en Scheolmester gohn, de Doktor mot reopet wärt.

Teo´n Glück es et nich seo schlemm worn os et örst iutsach. Thorsten hät eune Gehirnerschütterung un mot för eun paar Dag int Krankenhuis. Öbber eujetlick – eujetlick goht dat jo auk anners. Eoder?